



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Takok aser tamakokji BJP atema tang tasen masü: BS Yediyurappa

Witsel international asaya nungi anener



VOL. XX NO. 211 (ADOK 211) DIMAPUR

AMUNGNÜ (SUNDAY)

MONUPII (MAY) 14, 2023

₹ 5.00

CM Rio-i Bank of Baroda kongsang ka lapoktsü

Dimapur, May 13, 2023 (TYO): May 13, 2023 nü Chief Minister Neiphu Rio-i Bank of Baroda indang Botsa Branch lapoktsüo.

Iba sentong nung General Manager & Zonal Head Kolkata Zone, Debadrata Das; Network DGM Kolkata Zone Debashis Bakshi aser Deputy General Manager & Regional Head, Jorhat Chandan Sahoo nungertem aden.

"Nagaland nung State Bank of India sülen Bank of Baroda ajanga mapa tajung inyaker aser ktdangsurtemi Botsa branch lapoktsüba atema kanga pelar. Iba ya ozü constituency nung mezüngbuba kongsang lir aser nübertem kanga ajangzüksü" ta CM Rio-i ashi.

Paisa nübertem dang Bank of Baroda indang National Policy Programme aser tanga scheme balala kübok maongka agitsü atema ayongzük.

Rongsenketzüng renlokba nung senotsü rejutem ajanga tongtipang shilem agir aser iba kongsang ajanga nübertem rongsenketzüng renloktsü imlar, ta paisa ashi.

CAST aser CALT-i mapa tamajung inyakerkem aitsür

Dimapur, May 13, 2023 (TYO): Chümoukedima Village Council ajanga May 11, 2023 nü Seiurüza Colony, Chümoukedima Town nung alir Merentoba Imsong aser Sentimongla Imsong nati ozüing alema mapa inyakba osang angashia kanga aoksar ta Chümoukedima Ao Senso Telongjem (CAST) aser Chümoukedima Ao Lanur Telongjem (CALT) ajanga metetdaksüo.

CAST aser CALT-i tena aitsür

Yimdaklirtem, aluyimertem aser shishilembartemi bank sobaliba benshitsuä. Tarutsü anogotem nungbo bank ajanga dang senotsü agütsüteptsüsa mapang arutsü aser tanü sorkar mapa inyaker itasen aser kaketshirtem indang scholarship ajak bank accounts ajanga dang enoktsür ta Rio-i metetdaksü.

Botsa branch lapokba züngsema Nagaland nung Bank of Baroda indang kongsang 14 lir aser ano maneni blocks ajak nung lapoka aotsü mepishir, ta paisa ashi.

Iba sentong nung GM Debadrata Das-ia o tatsüka jembidang Bank nung account lapoktsü aser tajangzüktem agitsü ayongzük.

Paisa Bank of Baroda ajanga loans aser facilities agütsüba indang osang lemsatop.

Iba sentong nung Advisor to Chief Minister & Chairman Khadi Dr. Neiphrezo Keditsu, Commissioner & Secretary to Chief Minister Kesonyü Yhome, sorkar ktdangsurtem aser temeket aliba Village Chairmen & Council züngsemtem aden.

asér Chümoukedima Village Council-i mapang shitak nung teinyaktsü tim inyakba atema tenüngsang agütsür ta metetdaksüo.

Ozüing amertemi ozüing alema inyaker ana nem tapet temerenshi agütsütsü ayongzük. Maneni, Chümoukedima nung aliba Aortemi ibala mesükba mapa meinyaktsü aser Aor nem tenüng menük bentsür marutsü metetdaksür, ta CAST aser CALT-i sangdong ka nung metetdaksü.

FNR-i Khaibung nung Kuki nunger semdang



Dimapur, May 13, 2023 (TYO): Manipur nung nübertem timtemba atema tebilemsü bena Forum for Naga Reconciliation (FNR)-i Honibarnü Manipur semdangogo.

FNR telok ka den NSCN (IM) aser NNPGs nungi teshimtet nübotemi tanü Kuki Baptist Association Mission Center, Khaibung semdang.

Iba mapang NSCN (IM) aser NNPGs-i FNR ajanga jang aser

dal bener oa agütsü.

Mission Center, Khaibung indang Chapel Hall nung sentong ka agidang Kuki Inpi Nagaland, Kuki Students Organization, Nagaland aser Kuki Nute Kiloikhom (Kuki Mothers' Association) ajanga Kuki nungeri timtem balala ajurua aruba osang lemsatopa liasü.

Iba mapang Rev Dr Wati Aier, Rev. Dr. Ellen Konyak Jamir aser Dr. Visier Sanyü nungeri FNR tenüng nung jembidi.

Karnataka nung Congress-i BJP madak takok tulu angu Kcharge-i 'BJP-free South India' ta sangoktsür



Congress-i Karnataka assembly election nung takok anguba sülen Congress national president Mallikarjun Kharge den Karnataka Congress president DK Shivakumar, taoba Chief minister M Siddaramaiah aser Randeep Surjewala nunger Bengaluru nung pelatepba angur.

New Delhi, May 13, 2023 (Agencies): Congress-i May 13, 2023 nü Karnataka assembly election nung takok tulu ngutetogo. Bharatiya Janata Party-i aniba sorkar madak parnoki takok angu.

Züngsem 224 agi akümba Karnataka assembly nung Congress-i majority mark 113 adener menden 135 nung takok nguogo.

Taküm election nung BJP-i menden 65 nung dang takok angu.

Karnataka nung Congress-i BJP madak takok angutsü ta ajitetba sülen tanü anogo tom ka tashi nungi Bengaluru aser Delhi nung Congress headquarters nung aser ano linük kübok tesem aika nung benjungtep tenzüka liasü.

Congress president M Mallikarjun Kharge-i iba takok ya 'BJP Mukta Dakshin Bharat' (BJP free South India) lir ta metetdaksü.

Honibarnü Karnataka kübok tesem balala nung centre 36 nung votes azüng. Taküm election nung candidate ajak agi parnok 2,615 lir.

Karnataka state sorkar indang kümsük May 24, 2023 nü tembangtsü.

Congress lennir Rahul Gandhi-i party lennirtem aser züngsemtem nem tenüngsang agütsü.

Paisa Karnataka nung Congress indang guarantees 5 mapa küma inyaktsü ta nangzük.

Külen, Prime Minister Narendra Modi-ia Congress nem tenüngsang agütsüo. "Nübertem taginüba tongtettsüsa inyaktsü moatsür" ta pai metetdaksü.

"Karnataka elections nung

onok yarir ajak dang pelar. BJP karyakartas (party workers)-i meranga inyakba atema tenüngsang agütsür. Onoki tarutsü anogotem tajungtiba nung Karnataka tenzüksü" ta Prime Minister-i ashi.

PM Modi-i Karnataka tesem balala nung BJP atema nüboyima senzüa liasü. PM Modi-i kanga meranga senzüba ajanga Karnataka state BJP lennirtemi parnoki takok angutsü tamang liasü.

Congress lennirtemi Chief Minister atema DK Shivakumar asü Siddaramaiah shimtsü ta nisungtemi osang angadar.

"Karnataka Assembly elections nung takok anguba ya 2024 Lok Sabha election nung Congress-i takok angutsü atema mera ka agiba lir. Taoba Congress tir Rahul Gandhi-i Prime Minister inyaktsü imlar" ta Congress lennir Siddaramaiah-i ashi.

Osang angazükba agi Siddaramaiah ya Karnataka nung Chief Minister inyaktsü nübo tongtipang ka lir aser Deputy Chief Minister asem shimtsü akok.

"Karnataka election results ya PM Modi aser Union Home Minister Amit Shah anema votes enoktsüba lir" ta Siddaramaiah-isa metetdaksü.

Shivakumar aser Siddaramaiah naprongi Gandhi'er kibong dang pelaba metetdaksü.

Külen, Congress-i takok anguba candidate tem dang certificate agizükba sülen Hilton Hotel, Bengaluru-i arutsü osang metetdaksüo. Deobar nikongdang Congress legislature party senden ka amentsü ta osang angazük.

"Karnataka-i putiotsü tasen ka yangluogo. Karnataka-i Karnataka nunger dang dang

masü saka linük ajanga dang democracy atema taküm tasen ka sayuogo. Iba ya Kannadiga nunger shia atema takok lir" ta Randeep Singh Surjewala, AICC in-charge of Karnataka-ia metetdaksü.

"Nübertem noktaker onok pusemogo. Sorkar ktdangstüba tamajung anema parnoki onok nem votes enoktsü. Iba ajanga Karnataka nung voters saksalemba sayur. Prime Minister Narendra Modi, Home Minister Amit Shah, Union Minister aika den ano state balala nungi Chief Minister tem yangi arua mongzüka nüboyimogo. Parnok nübo, sen aser tashi amshia nübortem longjemer Congress nem vote enoktsü" ta AICC President Mallikarjun Kharge-i ashi.

"Karnataka nungeri oshidang tajung agütsüba atema tenüngsang agütsür. BJP-i double engine government ta ajaba sen aser tashi anema nenoki votes enoktsüo" ta Congress lennir tejen P Chidambaram-ia metetdaksü.

"Karnataka nunger nem tenüngsang agütsür aser pelaba metetdaksür. Iba election ya state assembly indang election ka dang masü saka Indian Constitution tamendakdang nung ammetba aser tashiyim o telemsa bener arutsürtem noktanga election ka liasü" ta Chidambaram-i ashi.

"Karnataka ya advanced states rongnung ka lir aser tang nungi tejakleni otettsü aser rongsenketzüng renlokba aser human development indicators nung jenjang tajung angutsü. KPCC nung inyakertemi tasü itta raraba aser takok tulu anguba atema tenüngsang agütsür" ta paisa metetdaksü.

Dimapur District Citizens' Forum-i Manipur atema bilemetsür

Dimapur, May 13, 2023 (TYO): Honibarnü Dimapur District Citizens' Forum (DDCF) Sanen Luden senden ka amendang Manipur nung lisopur aser lisopur masürtem tsüngda mepetmesü adokba onük benoka jembitepogo.

Senden nung adenertemi nisung taküm laluba, kiojen

samaba aser tamangba yimsü dak sendakba rejutem nung kongshiba khukhua aitsüo.

Ibala inyakyim ajanga shinga majangzükker aser ajak atema takoksa lir ta DDCF-i metetdaksü.

DDCF-isa lisopurtem aser lisopur masürtem dang ozüing alema inyakba anentsü aser

olemtep ajanga ken o angatetteptsü atema mepishia metetdaksüo.

Manipur state sorkar aser Centre sorkaria iba khuret atema nendaka inyaksüla aser Manipur nung tensa süngjemdaksütsüla ta Media Cell, DDCF-i sangdong ka nung ashi.

Ao Kaketshir Telungjem Dimapur Inty mungdang mungogo



Ao Kaketshir Telungjem Dimapur (AKTD) 46 buba Inty Mungdang aser 15 buba Takoker Tetushi sentong Saku's Mission College Auditorium nung May 13, 2023 nü alidang tangokba noksa ka nung AKTD ketdangpurtem, sentong nung shilem agirtem aser 2021 & 2022 küm HSLC aser HSSLC tatidang nung Dimapur nungi Top 20 jenjang tongtetertem angur.

Dimapur, Monupii/May 13 (TYO): Landmark Colony, Dimapur nung aliba Saku's Mission College indang Auditorium nung May 13, 2023 nü Ao Kaketshir Telungjem Dimapur (AKTD) 46 buba Inty Mungdang aser 15 buba Takoker Tetushi sentong "Renloka aotsü lenmangji akangshidi," omen nung ajemdaker anepdang 11:00 ako nungi tenzüka agia liasü.

Iba mungdang sentong ana lemsar agia liasü, kong mezüng sentong nung menden Chubamongla liasü aser Jungshimanen, Youth Director, DABA ajanga sarasadema sentong tenzüka aser AKTD tir, Tamsükaba Aier-i menden okila o jembia liasü.

Ao Senso Telungjem Dimapur tatong tir ajanga kaketshir den tayongzüka o jembia, Imsüinla Lemtur ajanga temeja ken ka aten aser AKTD senyur, K. Nüken Jamir-i tepela o jembia liasü.

Iba sentong nung Kaketshisadang & Nütsüngsük Asadang zülir, Sentienla ajanga Dimapur nungi Aotsür-Aor kaketshirtem 2021 küm High School Leaving Certificate (HSLC) tatidang nung Top 20 jenjang tongteter 4 aser Higher Secondary School Leaving Certificate (HSSLC) tatidang nung Top 20 jenjang tongteter ana aser 2022 küm HSLC nung Top 20 jenjang tongteter nisung tenet aser

HSSLC tatidang nung Top 20 jenjang tongteter asem nem kulizüing kaket aser senpet agüja liasü.

Sentong nung o jembir Tamsuchuba Jamir, SDO (C), Chumoukedima ajanga omen nung ajemdaker jembidang renloka aotsü lenmang nung talenba salara lokti aintsü aser Naga nung aintsü, ta ashi.

Nai amshiba shisatsü nai metettsüla aser lenmang shidak nung shisatsü tajung amshira na aintsü, ta pai ashi.

Tsüngremi agütsüba sempet nai bushitetsüla aser aji lenmang shidak nung amshitsüla, saka iba sempetji mamshitetba ajanga asenok mainer, ta ashi.

Dimapur lima nung asenok bendanger indang alar kumadokogo aser küm ishika tsüngta asenok yangi tali majungtsü. Anungji asenoki kanga junga shisadangtsüla aser Tsüngremi agütsüba sempet azümesen mesüi amshitsüla, ta o jembiri ashi.

Na doctor, engineer, politician, Tsüngrem tenzüker mesüra lenir akumtsü shingiaia nokdanga mali, anungji nai meranga inyaktsüla. State nung sorkar mapa lir saka nai mejanga melie azüngtsüla aser bushitsüla. Bendanger arua state nung IAS aser IPS mapa inyaker, saka parnok den asenok kecha balaka masü, asenoki meranga

azüngtsüla aser ajanzüksüla, ta pai ashi.

Iba sentong nung alirtemi lenmang meyanglura dangari meyanglutsüsü. Tetsükdaktsü lir, tezüdangtsü lir, saka nai Tsüngrem dang meshira moatsüsü, ta pai ayongzüka liasü.

Mezüng senden tembanga teloki sarasadema sülen lokti chiyongba mapang liasü aser iba sülen tanabuba senden tenzüka osang balala agia olemtep mapang agia liasü.

AKTD kümsük 2023-2025 atema iba sentong nung nungtet luden osang agüja liasü.

2023-2025 kümsük atema AKTD ketdangpurtem tir Imnatemu Pongen (Mangmetong), tatong tir Hangi Jamir (Mopungchuket), tongti zülur Limanungdang Longchar (Mongsenyimti) aser repsem zülur Imnameren (Khar) alitsü. Sanenluden tayonger Tamsükaba Aier (Mopungchuket), senotsü zülur Tongtang I Pongen (Yimjenkimong), sobaliba zülur Imliwapang (Mongsenyimti), saisapong zülur Pursunep Longkumer (Chuchuyimlang), tongtepratep zülur Moatemu Imsong (Asangma), kaketshisadang & nütsüngsük zülur Tsungrochetla Walling (Khensa) aser senyur K. Nüken Jamir (Chuchuyimlang) alitsü.

Fish GERMPASM Aquarium Dimapur nung lapokogo

Dimapur, Monupii/May 13 (TYO): Nagaland nung farmer tem atema Scientific Aquaculture dak sendakba nung capacity building programme aser Fish GERMPASM of Nagaland, Aquarium Unit lapokba sentong May 13 nü Brooder Fish Farm Dimapur nung agiogo.

Iba sentong ya ICAR - Central Institute of Freshwater Aquaculture aser Department of Fisheries and Aquatic Resources Government of Nagaland na longjemer agi aser ICAR-CIFA Director Dr. Pramoda K. Sahoo alaketa jaoker.

Okila jembiba mapang Director of Fisheries & AR Government of Nagaland Rongsennungba-i, iba project ya mapang talangka nungi inyaknüa aliba project ka, koba CIFA-i tanen makai teyari agütsüba ajanga inyaktetogo, ta ashiba den CIFA dang kanga pelaba lemsatepa liasü.

Nagaland nung fish spices aika lir aser iba ajanga ango balala metsüteter, kechiyong Nagaland kübok district 16 nungi bendenba indigenous ango Aquarium 42 lir

ta pai ashi. Paise, nüburtem ajanzükdaktsüsü atema iba unit ya kanga junga anepalua ayutsü asoshi department dang nenshia metetdaksü.

Sentong nung o jembiba mapang Director, ICAR- CIFA, Dr. Pramoda K. Saho-i, iba anogo ya kanga tongtibang anogo ka ta ashiba den iba project asangsang nung takok ngua inyaktetba atema team dang kanga pelaba lemsatep. Nagaland nung ango tapu balala ya tagidak kanga lir aser iba ya nüburtem aser department tejangraba ajanga ataloktsü ta ashi. Ango tapu balala shilem 60 shi tanga lima nungi linüki bener arur ta shia pai anogo metsüretem aser stakeholder tema dang angotem achitsü melena department nem agütsüsü ajungshi, ajita asünungdang parnoki wazüka yutettsü. Species tasentem wazüka ayutsü aser osang bendentsü atema bushisüngdangtsü, ta pai ashi.

Dr. Pramoda-isa, ango species tasen wazüka ayutsü atema lanurtem ajungmesotsü nungdakba lemsatepa den ango

metsüretem dang pei kidang aquarium ayutsü ajungshia liasü.

Project indang metetdaksüba mapang Deputy Director Of Fisheries & AR Dr. Vimezo Kire-i, CIFA-i mapang talangka department nem teyari agütsüba atema pelaba lemsatepa den maneni longjemer inyakyonga aotsü yongya ataba lemsatep. Paise, staff tem dang Aquarium tasenba kanga junga anepalutsü ajungshi, ajita asünungdang ango tapu balala wazüka yutettsü, ta ashi. Pai, iba Aquarium ajanga tanurtem kaketshisatsü bushiba mapang ango tapu balala indang angazüksü asoshi teyari agütsüsü ta ashiba den tarutsü nung Nagaland nung ango species tajungtibatem metsütettsü imlaba lemsatep.

Iba sentong ya Joint Director of Fisheries & AR Ketusieli Angami lenisüba nung agi aser Asst. Pastor, DABA Lanuakum Longchar-i bendanga agütsü sarasadem agi aser SDFO, Shamator Shamyung .O. Ongh-i tepela anküp o jembia liasü.

LCM-i tetsütem anogo sentong ayongzüker

Dimapur, May 13 (TYO) : Alima ajung nung Tetsütem anogomung amungba anogo nung tetsü temeim bilemteta pelateptsü asoshi Life Concern Ministries ajanga May 14, 2023 nikingdang 4:00 ako nung IMC Hall, Fellowship Colony, Dimapur nung sentong tajung ka ayongzüka lir.

Iba sentong nung akhi

tanü asüng kentener tajungtem jaoka shilem agidaktsüsü renema lir. Iba sentong nung tejangrar ajak arua adentsü pelashishia jaoker ta LCM sangdong ka ajanga metetdaksüogo. Parnok den mobile phone number 60091 49289 ajanga tongteprateptsü akoktsü.

KATK-i anükhu lemsatep

Dimapur, Monupii/May 13 (TYO): Kulolau Aghunato Tokukujomi Kuqhakulu (KATK)-i sangdong ka ajanga Retd. Secretary, Govt. of Nagaland asür Vihuto Yeputhomi May 10 nü asüba osang angazüka mang ayimba lemsatepogo.

Asür Yeputhomi ya Sumi nung asür talisa Aghunato temeket nung aliba nüburtem rongnung mezüngpur ka liasü, shiba 60s tetenzüklen kaketshisatsü bushiba nung takok ngua aoba sülen lenla balala nung Nagaland sorkar tenzüka aruogo.

Pa Tsüngrem dak amangba nisung ka liasü aser Arogo balala ajungkettsü atema bendanga

agüja inyakba den lenla balala nung Arogo dena tenzüka aruogo. Pa 2000 küm AIT Bangalore nungi Master of Divinity (M. Div.) tembanga zünga liasü.

Pa asüba ajanga tawa tulu ka adokdaksüogo, koba süngdaktsüsü asoshi tasak asütsü.

KATK-i, pa asüba osang angazüka mang ayimba den asür kinungertem den asükhu lemsateper aser tulusang tsüngremi asür tanüla teti tatem makadak anisüngzükdakjang ta sarasademtsür, ta KATK mendenbuba Hukavi T Yeputhomi aser secretary Mulato Katty nati külem sangdong ka ajanga lemsatep.

Non-teaching staff atema Work Ethics workshop ka agi



Akok Walling Sentimeren

Mokokchung, Monupii/May 13 (TYO): Fazl Ali College, Mokokchung-i ayongzüka May 12 nü Non-Teaching staff tem atema 'Work Ethics' dak sendakba nung workshop ka ayongzüka agiogo.

Iba sentong nung Retd. Principal, Dimpaur Govt. College, Akok Walling aser Associate Pastor, Mokokchung Town Baptist Arogo, Sentimeren Jamir na shisalen sayur liasü.

Mezüngbuba session nung Retd. Principal, Dimapur Govt. College Akok Walling-i, work ethics principles indang jembia. Pai taküm liyonga aotsü atema mapa inyakba, tejangraba agi mapa inyakba, tenzüksü atema inyakba aser tajangba angkateta mapa inyakba ta principles pezü indang jembia. Paise, nüburtemi kodang pei tejangraba agi, tenzüksü atema

aser tajaba angkateta mapa inyakdir indangji süngjang tajungba atanger ta ashi.

Paise, nisung ka itasen atema dang kodang mapa inyakdir parnoki lokti ajanzüksü atema kecha minyaker aser meyiper parnok nüburtemi sentoker aser iba ajanga parnok azüngmeyaka akümer, ta ashi. Pai, staff tem dang nüburtemi temlung lemtetba nübu kaka akümstü ajungshi.

Tanabuba session nung Rev. Sentimeren-i Laishiba dak ajemdaker work ethics indang jembia liasü. Session ajak tembanga sülen sensaksem mapang agia liasü.

Sentong nung Vice-principal, FAC Vinod Kumar-i lokti pela agizükba o jembia aser convenor, organizing committee, Mesutoba Ao-i tepela o jembia liasü.



Nagaland Police den longjemer HQ IGAR (N) kübok Assam Rifles Kohima Battalion-i May 11 nü Mohon Khola, Kohima District nung anti drugs operation ka ayongzüka agiogo. Meita aiba mapang tetsür ka ket nung sen lakh 2.25 alang SUNFLOWER Drugs Soap case pong nguteta liasü. La ya Senapati, Manipur nungi Dimapur-i aoba Winger Bus ka nung mener liasü. Temesepba mozü den aija alila ya South Police Station, Kohima nem bendanga agütsüogo.



May 13, 2023 nü Karnataka assembly election votes azüngba mapang New Delhi nung aliba Congress lenirtem AICC headquarters nung adenshia aliba noksa nung angur.

Takok aser tamakokji BJP atema tang tasen masü: BS Yediyurappa

Bengaluru, May 13 (Agencies): Karnataka assembly elections nung Congress-i takok anguba sülen Karnataka nung BJP lenir, BS Yediyurappa-i, takok mesüra tamakok angubaji party atema tasen ka masü; tamakok angubaji onoki meyipa repringhsitsü, ta metetdaksü. Tawa agiba election nung Congress-i menden 136 nung takok angu, BJP-i menden 64, JD(S)-i menden 20 aser tangartemi menden pezü angu. BJP-i tamakok anguba dak sendakba nung osangbenertem den jembidang taoba mapang

Chief Minister, Yediyurappa-i, "Takok aser tamakokji BJP atema tang tasen masü. Election osang ajanga party nung inyakertem aoksatsü menüingdak. Party-i tamakok angubaji onoki repringhsitsü. Ni nüburtem telemtetba agizüker," ta ashi. BJP lenir aser chief minister, Basavaraj Bommai-i, 2024 küm Lok Sabha election nung BJP-i takok angutsü, ta ashi. Bommai-i, "Onoki ayuba alizüng metongtet. Kodang osang ajak sangdongdir onoki asadangsü. National party ka ama onoki asadanga dang

masü saka level balala nung tamakok aser tashimait asadangsü," ta metetdaksü. Paisa, "Ato kilonser aser BJP nung inyakertemi kanga meranga inyakyonga onoki alizüng metongtet. Election osang tejangja sangdongba sülen onoki jungjunga asadangsü," ta ashi. Exit polls ajangabo, single largest party ji Congress asütsü saka party kati danga sorkar akümtsüsa menden peria menguteti hung assembly asütsü aser sorkar akümtsü atema JD(S) teyari nungdaksü, ta asadangteta liasü.

Centre nung secular aser democratic sorkar nungdaker: Siddaramiah

Bengaluru, May 13 (Agencies): Karnataka assembly election nung takok anguba sülen Congress lenir aser taoba mapang state chief minister, Siddaramiah-i, party-i takok anguba ya Ato kilonser, Narendra Modi anema onok nem tashi agütsüba lir, ta ashi. Osangbener den jembidang pai, "Iba ya Narendra Modi, Amit Shah (Home Minister) aser JP Nadda (BJP National Tir) nunger anema onok nem tashi agütsüba lir. Operation Kamala atema parnok ket nung sen aika lir, ajisüaka parnoki nüburtemi tamang katetbabo malizüktet. BJP-i state nung secular amokmerentsüsa liasü. Tesempa politics liasü, aser ibaji Karnataka nungertemi magizükteter," ta ashi. Honibarnü vote tezüngdak mapang nung Siddaramiah-i, "Onoki menden 130 dak tema nung takok angutsüa akok. Nüburtemi BJP sorkar agi lakteter liasü. Parnoki tim masüba nung

tashi amshibaji nüburtemi nguogo," ta metetdaksü liasü. Paisa, state election nung takok anguba ya sangküm Lok Sabha elections atema tajemdakdak mera ka lir; linük jenjang nung BJP tamakok ngudaktsütsü atema BJP den madenba party ajak longjemtsü imlar, ta ashi. "Asenoki Centre nung secular aser democratic sorkar ka nungdaker," ta pai ashi. Party-i takok anguba ya Rahul Gandhi-i Karnataka nung kanga meranga nüboyimba agi lir; pai party nung inyakertem aser voters tashi itdaksü, ta pai ashi. "Rahul Gandhi indang padyatra (Bharat Jodo Yatra) ajanga-a yariogo. Pai district aika ayimjem aser tongtibang onüktem benoka liasü. Mallikarjun Kharge, Priyanka Gandhi aser Rahul nungeri Karnataka nung meranga nüboyimba atema ni parnok dang pelar," ta paisa shisem.

May 15 nü Jharkhand nung rong ambulance service tenzüksü

Ranchi, May 13 (Agencies): Taruba hopta Jharkhand nung rong ambulance service mezüngbuba Sahibganj district nung tenzüksü, ta sorkar ketdangser kati metetdaksü. Rong ambulance tenzükba ajanga Ganga ayong anasa Diara area nung alir nisung lakh 2 dak tema tajangzük angutsü. Tawa state sorkari state yimtiba, Ranchi nungi air ambulance service-a tenzüka liasü. "Ayong anasa Diara area nung Panchayats aika lir. Tzüngluru mongpu nung ayong anasa alirtem tzümetsüng ajanga kanga timtemer," ta Sahibganj deputy commissioner (DC), Ram Niwas Yadav-i metetdaksü. "Tzünglu aruba mongpu nungbo iba area nung

immunization densema health programmes aika anena atar. Anungji onoki parnok nem health services agütsütsü atema rong ambulance tenzüksü telemtetba agia liasü," ta pai metetdaksü. District mineral foundation trust (DMFT) nungi Sahibganj administration-i rong ambulance ana ali aser Hokolbarnü rongji Sahibganj tonga aruogo. Rong shiaji sen lakh 29.17 agi ali. "Rong ambulance nung oxygen cylinder, ECG equipment, shirangertem atema cabin, lab technician aser tangartem densemabo rong shia nung sen lakh 48 shi adoktsü," ta pai ashi. "Rong ambulance ka Rajmahal area nung aser ka Sahibganj area nung amshitsü. Deoghar nung AIIMS dak

alaka Santhal Pargana region nung tanga health facility kecha mali. Emergency mapang nung rong ambulance ajanga shirangertem Bihar kübok Purnia aser West Bengal kübok Malda-i anir aotsü," ta paisa metetdaksü. Diara area nung tang shirangertem akhidang nungi amshia aruba rong ajanga Ganga ayong adena hospital-i anir aoer, ajisüaka tang nungibo rong ambulance ajanga khen nung nisung trok tashi anir otetsü. Osangbener den jembidang Sahibganj civil surgeon, Dr Ramdeo Paswan-i, "Rong nungji first aid, ECG, oxygen inhaler aser flow meter alitsü. Rong nungji GPS aser fire extinguishers den masthead lights alitsü," ta metetdaksü.



May 13, 2023 nü Kolkata nung West Bengal Chief Minister, Mamata Banerjee-i lar kima Bollywood actor Salman Khan agizükdang tangokba noksa nung angur.

GOVERNMENT OF INDIA
MINISTRY OF LABOUR AND EMPLOYMENT
DIRECTORATE GENERAL OF EMPLOYMENT
F. NO. A1 - D/2/2023 - ADMIN SECTION

MINISTRY OF LABOUR AND EMPLOYMENT INDANG NATIONAL CAREER SERVICE PROJECT KÜBOK CONTRACTUAL BASIS NUNG YOUNG PROFESSIONALS 10TH BATCH MAPA ATEMA JAOKER.

Ministry of Labour & Employment Directorate General of Employment-i "National Career Service Portal" ya National Employment Service indang modernized version ama agizükogo, aser iba kübok Jobseeker/Employer registration, Vacancy Notification, Counsellor services, Online/Offline Job Fairs, online Employability Training, Bilingual call centre, rich career content den sectors aser profiles den career dak sendakba services balala tajungtiba nung agütsütsü atema külem Centralized platform ka asütsü. Iba scheme kübok Ministry of Labour and Employment-i Model Career Centre shia nung Young Professional 1 shimmer. Anungji linük tesem balala nung Model Career Centres terenlok atema contractual basis nung YOUNG PROFESSIONALS mapa atema jaoker. YP ji Director NICS, Directorate general of Employment, Ministry of Labour and Employment tetuyuba kübok inyaktsü. Application aser temsüa aliba telatetbatemji www.ncs.gov.in nung angutsü. Tejangrartemi www.ncs.gov.in nung NCS portal nung application agütsütsü akok. Iba advertisement agütsüba anogo nungi tenzüka anogo 15 tashi nung application agizüksü. Physical Applications magizüksü. Application atema tsünglanglen aliba link repringang.

Slno	Vacancy Regions	No. of	Advertisement Link
1.	North Eastern States & Nearby North Eastern States	Position 08	https://www.ncs.gov.in/Pages/ViewJobDetails.aspx?JSID=bjZNOUQA0ZY%3D
2.	North Eastern States & Nearby South Indian States	09	https://www.ncs.gov.in/Pages/ViewJobDetails.aspx?JSID=64HcpBcCuxO%3d

Link for More Details:
<https://labour.gov.in/circulars>

National Institute for Carewer Service
 Directorate General of Employment
 Ministry of Labour and Employment

CBC 23188/12/0001/2324



May 13, 2023 nü Pakistan nung aliba jail balala nungi India nunger angopur 198 chiokba sülen tangokba noksa nung angur.



TIR YIMYIM

YIMOBILEM (EDITORIAL)

DIMAPUR AMUNGNÜ, MONUPII (MAY) 14, 2023

Kibuba kü ojala !

Ni adenba tenla kidang sayutsüngiri aiben Tenüngsang Ken 23 nungi tanüla chiyongtsü agütsür. Idangji teti kü mulungjang nung David asoshi Kibubaji sannüker mesük süra ni asoshia kibubaji shiba mesük asütsü ta bilemer. Atangji, asenoki jet ta angatetsü agi, Tenüngsang Ken 23 nung 'Kibuba kü sannüker' ta ashiba tetezüji David-i pasasa Kibubaji pa mesük santem kanga meima anükba sannüker lir ta pai santem meimba den Kibubai pa meimba medemdanga mejemba ken ka lir. Aji oda, aonung anüngdang, anüpu tsünglu aru ta mali pai santem lendongi meidaksütsü asoshi amuia moui timtem aika agia taremsük agi anükba ama "Kibubai ni anüker" ta David-i tanüla nung Kibuba temeimji yimdangi arua tepela nung mejemba kenji ibai ka lir. Aji oda, David dang pai anükba santemi ola adoka meshiaka, pai parnok aya tzüratsüba mapang meteta rem lanu chidakja tzü tajung jemdaksüba ama, anogo shia David chuba langbang sünga chiyongtsü renema yutsüba pai meranga inyakba agi masü saka Kibuba temeimi renemtsüba lir ta atenba David tenüngsang kentem rongnung jangratemtsüji ibai lir. Atangji, item tajung aser taochitemji kodang asen taküm aser kibong nung anogo shia atalokbatem den medemdangdir, David chubai pa sanükba mapatem den medemdanga Kibubaji sannükerang mesüka ta ashiba ama, Kibuba ya ojala mesüka ta asenoki angatetsü. Asenok mejungaka Kibubai koda asenok meima anepalur, kasaji ojalai asenok kinü asüdangyongi tain küma asenok meimer. Atangji, tanü asüng asenok aikati pei tsürabur memeimer. Asenok aikati pi matsüngdang ojala dang oja ta ajatsü aaker. Ojalajibo lajar ama tangar nem mesüdaksür. Iba tia nungjia ojalaibo asenok asoshi sarasademtsür. Tanü ya alima ajunga nung tetsü temeim bilemteta amongba anogo lir, ajisüaka iba anogo nunga ojalaibo asenok dang nungi kecha meimlar saka lai-ang asenok taküm aser kibong nungdak asoshi bilemtsür. Ashiko, kinungtsü aika kinungboi dena meimtsü melen mezüngmeshia amshia alitsüa akok. Iba tia nunga ojalaibo aremsük, kechiyong lai lar chirnur tarutsü tia meraksadaksüner. David-i tasü aküm ajanga oaka kecha tsüba mali, kechiyong Kibuba pa den lir ta ashibaji asenok kibong tensa tia den kodang medemdangdir, kidang kibong nung tangar dang nümamedangtetsüsa aika atalokaka, makamait tia ajuruaka, shilumanem agi tongaka, ojala lir nung koda, la sarasadem agi akoktsü nung koda, lai tasü idaksür nung koda aser la teka agi anepalutsü nung koda, tanü yamai asüyonga ojala ket agi anitsü nung koda (?), ojalaibo akoktsü nung koda (?) ta asenok tanurtemi ojala temeim dak tamang aser teimla ajak yur ojala nung sanga atenba kenang mesük. Atangji, ni asoshibo Kibubaji kü ojala, kechiyong ojalai ni meimba ama Kibubaia ni meimer ta ni angatetogo. Ojalai asenok temeimtsüka asüba agi meimer masü saka asenok tashi manga aser temeimtsü maket süaka, lai asenok tagidak maka küma moudaksüner. Aji oda, asenok alemli ali kümer alitsüba purtem ser nung, ojalai tezümedangi meimba agi aser laibo asenok dak tamang akaba agi aser lai Tsüngrem dang maneni mepishitsüba agi, tanübo asenok temang dang masü saka tanüla dena kümzüka lir. Ibayongji, David chubai Kibubaji pa ama sannüker tajungji, pa arishi tepiyong tepela aser taochi nung alitsü aser külenang ano, kodanga tatem maka Kibuba kidang alitsü ta tamang agi tanüla nung atenba ama, asenokia kodang Kibuba temeim indang bilemdangdir, Oh! Kibubaji ojala, Kibubaji kütsü amai ta tanüla nung jangratem aser anisüngzük tulu ngua memeteti asen bang nungi ken adokadoktsü. Atangji, Kibubaji kü ojala süra, la temeimjia Tsüngrem meim ama kecha dena asadangteptsü makok. Lai chiyongtsü tajung mechiner kechiyong lai asenok nem chidaksüner, labo manünür kechiyong lai asenok tama amui odaksüner, labo meshiranger kechiyong lai asenok nem timtem magütsüner, labo ajak peria lir kechiyong lai asenok tama peridaksüner, laibo kecha metsübur kechiyong lai asenok metsübudaksüner, laibo kodanga mejashir kechiyong lai asenok mejashidaksüner. Laji temeim ojala. Atangji, David asoshi Kibubaji sannüker süra asenok asoshibo Kibubaji ojala asütsü.

OLEMSABANG

OJALA TEMEIM

~ Moakaba Imchen, Dimapur.

Tanü pongmang ka amai, Ojala nükalai arur.
Tsüngsak yipru mopung,
Anü tesashi, tsünglu agi aja-a,
Kibong asoshi meranga inyaka,
Akümlir wadang lai tasüeta nokdaker.

Timtem khuret den anibelem jenti liaka,
Ojalai pelaseta kidangi shilanger.
Lai menürem jakden dener azüeta,
Otsü tatongi longa sayubentsüa,
Teyanglur Kibuba dang temoatsü meshitsür.

Shilu manem agi tonger, Ayakhu! Tenna alidang,
Tenük mesepshi nung arua, amangi sangwa küma anepalur.
La asoshi pei tanurji senti berem.

Temeimertemi sempettsüdang, jala jabaso bilemtetta rizüngtsür.

Ojala temeim kodanga tatem maka.
Ali wadang nung tamakok ngur,
Tejashi nüktsü agi nenneta alidang,
Ojala temeim O-i mulung süneptsür.
La tejak nung sentsü jenaka,
Ojala temeimbo kodanga majener.

Tasü yipten nung tashidak den rarayonga,

Lai chirnur asoshi sarasademtsür.

Iba tepur tajung lima,

Tembar adianu, temeimer jenti liaka,

Oja! Nü temeimbo madoksa!

Meimchir soli süli lima,
Akok ka asübo, taküm arishi ya sota linüali.
Akümlir nung aener ka ama amongdang,
Ojala nem aküm tetushi agütsüdi.
Tsüngremi Ojalatem arishi talang temjena moajangma.
Amen.

KÜ PUNGMANG NUNG OJALA MEPET NUNG ADOK

~ Tiala Imchen Dimapur.

Tamasa Ojalatem ajak dangi 'Happy Mothers Day' salem abener.

"Oh! Kü meim Oja,

Na tasü akhüm lenden ajanga oadokogo,

Shi nungbo na akümlir rongnung mali,

Saka ne tanela onok den aliba,

Metetdaksütsü aonung pungmang nung,

Na mepet manung adoka sayudang,

Ozü mulung anisüngzük.

Saka ya pungmang asü asangsang ta,

Ozü tenük nungi nüktsü netta bilemer.

Anogotem aser küttem süitemaka,

Ozü na menungraba manenteter.

Tanüa akhumlir Ojalatem tushiba anogo,

Oh! Oja, na mamateti ozü nükla nung angur.

Na lila sang, tola tasen ka den,

Aon tajungtiba soa renemer,

Teronem menema agütsünüali!

Shiri Ojala peladaksür,

Pa ali nung tasoshia alitsü,

Kibuba tenük tesa agi ajiokangma ta mepeshir.

Ojalai yipru mopung tesashi, anü tatsük,

Tsüngsa-rusa ajak tezükta alu inyadang,

La sentsü, topur tajung to agi, soru tamajung,

Kümdaksüba na mesüttdang raksaba.

Tanü na tular menden nung amenba,

Aser lokti senden balala nung yakbang nung,

Meraketa mendaksüba jenjangji,

Ojala takümi alizüka toktsüba jenjang lir.

Oh! arung, Tsüngrem sürbo Ojala ta tushidi,

Shiri Ojala atakatemdir, Pa amjang nung milen aseptsü.

TSÜNGREMI OJALATEM MOJANG AMEN!

OJALATEM

Onok dang teti meima aliba ojalatem, tanü iba anogo tulu nung onoki na toshir, alima nung Tsüngrem sürbo ne temeimsa tulutiba. Ne sarasadem agi mangli-sangwali metitemi onok teti kümzüka alir aser ne temeimji kecha tena metemdangtsü makok, kibong nepener den tashi mangar jenti liaka nai melaktet aser mebendangi japaso/ jala ajak kasa meima anebalu. Tamajung anogotem ajurudang nai onok mepaidok, lanuwa nungi onok yinteta atudang nai Tsüngrem o sayuba den sayubentsü tajung agütsüba onoki mamar. Kechiserna jenjang tulu aketba hon/taripi dang nungia nai onok dang alia meimogo, iba asoshi onoki na akümtsüba tushir, tanü Ojalatem aika iba anogo matateti arishi tempangogo. Item kibong molong zürepa alir asoshi sarasademtsür, maneni Ojalatem kwika iba alima nung taküm lir nenok ajak Yihova Tsüngremi arishi talang moajang Amen.??????

-M.A. Lcr., 4th mile.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

England nung Arogo aseme Christian Aid telok yaritsü



Christian Aid telok yaritsü atema Woking, England nung United Reformed Church nung Laishiba Lipok nungi Jungkai Adok tashi azungba nung shilem agitsüpurtem tangokba noksa nung angur.

May 13, 2023: Khristan melungtet telok- Christian Aid yaritsü atema England nung Surrey kübok Woking nung aliba Arogo aseme Christian Aid Week (May 14-20) nung senotsü bushiba sentong balala ayongzüka agitsü.

Goldsworth Park nung aliba St Andrew Arogoi Christian Aid telok yaritsü atema coffee aser cake ayoktsü. Iba sale ji anepdang 10:00 ako nungi nikongdang 1:00 ako tashi Andy's Community Café nung agitsü. Coffee mesüra cake malinertemia tenla agütsütsü

White Rose Lane nung aliba Woking United Reformed Church-i May 17 aonung 9:00 ako nungi Laishiba azung tenzüksü aser May 21 Amongnü anepdang tashi nung Laishiba ajak zungmatsü. Lai azungba tiyongtsü nung sentong balala agitsü aser item sentong nung sarutetba senji Christian Aid telok nem agütsütsü.

Brewery Road nung aliba Trinity Methodist Church-i May 20 nü Plant & Craft Sale alitsü aser iba nungjagi ajangzüka senji Christian Aid nem agütsütsü.

Christian Aid ya 1945 küm British aser Irish Arogotemi Second World War sülen refugees yaritsü nükjidong nung tenzüksü Khristan melungtet telok ka lir.

Parnoki linük balala den partnership nung alima tesem balala nung timtemertem yarir aser meimchirtem temeden atema rarar.

Talisa Christian Aid-i alima nung kanga sensaktiba nisungtem yaritsü atema rangloker inyaker. Tang parnoki Turkey aser Syria na nung rangloker inyaker.

MoB nung temeshi aini aoertemi semdangba Tenla ki 7 sayatsü

Washington, D.C., May 13 (Agencies): Washington D.C. nung aliba Museum of the Bible (MoB) nung temeshi aini aoba puti otsü tejangja angatetsü atema temeshi aini aotsü asoshi Khristantemi maongka angutsü.

Museum of the Bible indang exhibition tasenba, "A Journey of Faith: The Seven Pilgrim Churches of Rome," nung item Arogotem indang puti otsü tejangja shia lir aser Vatican Museum aser Library nungi bener aruba kakat-a aika angutsü.

Exhibition ya May 12 nü tenzüksü aser September 10 tashi agitsü.

Museum consultant curator, Corinna Ricasoli-i, "Putu aika Europe tesem balala nungi

Khristantemi Rome-i oa Pilgrim Churches tenet semdangogo," ta metetdaksü.

"Temeshi aini aoba ya shi nung dang masü saka tanela tsütsü temeshi aini aoba lir, koba ajanga tamangertem tamang tashi itshir," ta lai ashi.

2000 küm Jubilee jakdang Tenla ki tenetji St. John Lateran, St. Peter Basilica, Basilica of Saint Paul, Basilica of St. Mary Major, Basilica of Saint Lawrence, Yirusalem nung Basilica of the Holy Cross aser St. Sebastian Outside-the-Walls liasü, ajüsüaka 2000 küm Pope Saint John Paul II-i St. Sebastian church ji Sanctuary of Our Lady of Divine Love agi melenal liasü.

Art & Exhibitions Lead

Curator, Amy Van Dyke-i, iba exhibition ajanga temeshi aini aotsü (virtual pilgrimage) atema Khristantemi maongka angutsü, ta ashi.

Van Dyke-i ashiba agi, Museum of the Bible-i küm ka tejaklen nungi iba exhibition atema renema liasü aser Vatican Library danga iba exhibition atema kakat aser oset balala apuja alitsü asüngdanga liasü, ta metetdaksü.

Museum of the Bible chief curatorial officer, Jeffrey Kloha-i, iba exhibition ajanga Khristantemi wadang balala nung kanga mazüngi aliba nungi anisüngzüker Arogotem puti otsü metetba ajanga tangar tenzüksü atema ajungmesotsü imlar, ta ashi.

Kaduna state nung Tenla kidang nungi Khristan 40 puer ao

May 13, 2023: Amongnü (May 7, 2023) northern Nigeria nung Khristantem tekülem sentong agiba mapang nung prangpong amer telok kati Khristan 40 puer ogo, ta International Christian Concern (ICC)-i metetdaksü.

Kaduna State nung Christian Association of Nigeria (CAN) chairman, Rev. Joseph John Hayan-i, Amongnü Madala yimdak Bege Baptist

Arogo Tenla kidang Khristantem tekülem sentong agiba mapang nung prangpong amer telok kati Khristan 40 puer ao, ajüsüaka kasa aonungjisa parnok 15 bo jena otet, ta metetdaksü.

"Tanüngba nisungtem chioktsü atema parnoki sen akhangba shidi onoknem magütsü mesüra onok den tongtepratep masü. Parnok melungjang nung jembia

tanüngba Khristan 25 chioktsü atema onoki sarasademtsür," ta pai ashi.

2022 küm alima nung Khristantem teimtiba tepsetba linükji Nigeria (5,014) liasü, ta Open Doors' 2023 World Watch List (WWL) report ajanga metetdaksüogo.

Tang alima nung Khristantem alitsü tamajungtiba linük 50 rongnung Nigeria ya jenjang 6buba nung lir.

ANOGO ABEN TSÜNGREM DEN

MESHITETA LIANG

"Kolosi nung aliba Khrista temeshipurtem aser temulung lemtetba adianutem dangi asen tebu Tsüngrem nungi nenok dangi tesünep süang."

~ Kolosi 1:2

Temeshi nisung ka ta asüba tenüng ya kanga tulu aser mashi nisung ka dang ajatsü makok. Tenyar Pauli tamangertem dang 'temeshi asütsü ajabatem' ta shia angur (Efesa 1:1). Temeshi nisung kaji Tanela Temeshi agi sünga aser pa kechi asoshi Tsüngremi aja iba nungi marakzüi noktaksüla. Tejen Lai nungji kodang reprangdangdir Tenüngsang Ken züluri-a temeshi nisung dangji "tamaren" ta shia angutsü, "Kibubai tamang katetba temeshipurtemji koda tamaren! Parnok dak kü tepela ajak lir" Tenüngsang Ken 16:3. Tsüngremji temeshi lir anungji asenoka temeshiba nung alitsü asoshi pai asenok dang nungi akhanger.

Ya asenoki angatetdi aser asen mulungjang nung teti rizünga yudi, Tsüngrem den lungjemba ajanga asenok, temeshi kümdaktsür, aser Tsüngrem O-i kechi ashir itemji tashi angara Tanela Temeshi ajanga asenok tali temeshiba kümdaktsütsü.

SARASADEM:

O Tsüngrem! Temeshi nung alitsübaji koda tajung aser jangratemtsü. Iba jenjang nung ni lidi. Amen.

Myanmar nung Arogo lenirtemi rara ajanga kongshiba Arogo 7 semdang

May 13, 2023: Myanmar maneni shells ajanga kübok Kalay nung Arogo Tenla kitem poksatsür.

lenirtemi sepaitem aser Taküm February ita democracy pusemba nunga Kayah state kübok civilian teloktem tsüngda Hwarikhu yim anasa rara ajanga kongshiba sepaitem aser lisopur Arogotem sema senzüogo, teloktem tsüngda raraba ta International Christian sülen sepaitem indang Concern (ICC)-i shells anati Pekhonnung aliba Our Lady of Sorrow metetdaksü.

Putirtem aser nun tem Tenla ki poksaja liasü. den lanurtem noklang Kayah aser Shan state aikati Kalay nung aliba na tsüngda arrtsülen Arogo tenet semdang. sepaitemi shells amshia

Myanmar nung rara amakba ajanga Hwarikhu ajanga tamajungtiba yimdak Arogo züngsem kongshibaji Kalay diocese meyirjang aika jenshiogo. lir. Anogo shia khatepba Khristan nütsüng ajanga Khristantem teimba aliba tesemtem timtemer aser Arogotemi rongnung Pekhonnung noklang aika Tenla densema lir aser iba tesem kidang jenokdaksür. nung sepaitemi Tenla ki

Khristan nütsüng aika 10 shi raksatsüogo. Iba aliba Chin, Kayah, Kachin Arogo kübok Tenla ki aser Karen state tem nung trok shibangogo aser sepaitemi parnoki civilian Sacred Heart Cathedral telok balala anema rarar, densema Tenla ki aika ta ashir saka sepaitemi maneni amaker mesüra Tenla ki aika raksatsüogo. raksatsür.

2021 küm February ita Kayah aser Shan state nung sepaitemi sorkar na nung Khristantem atsüngdokba sülen nungi densema nisung 1,50,000 iba linük nung rara shi Tenla kitem, camps manener. aser arem nung jenoka lir.

Myanmar nung Arogo Nütsüng million 54 lenirtemi linük nung aliba Myanmar linük tekülem kitembo nung Khristan nütsüng kümzüka ayutsü shilem 6 jungnüa lir aser tayongzüka aiben Buddhist nütsüng shilem agütsüyonga sepaitemi 89 lir.

AO OSHI ANGAZÜKDAK:
TANÜ ANGAZÜKTSÜBA OJANG



Purapuji

(v) nungdak maliba mapa inyakloka aoba (useless creation)
* Tanü asüng **purapuji** mapatem nung senotsü kanga endoker.

Pusapulem

(v) taoksa nung asatep (commotion)
* Menoknok anakba mapang nisungtem **pusapulema** aküm.

OLONG PAITEP # 6514

1	2	3	4	5
6	7	8	9	10
11	12	13	14	15
16	17	18	19	20

TIPLÉN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alla - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6513 TELANGZÜBA

TIPLÉN :

- 3. Tatem, 5. Jabaso, 6. Kotak, 8. Arr,
- 9. Aut, 11. Lungpok, 14. Pua,
- 16. Sen, 17. Mitsa, 18. Nükpok,
- 19. Ozüng.

LANGTSÜNGLEN :

- 1. Ajuru, 2. Jaja, 3. Toktep,
- 4. Tatsük, 7. Kasa, 10. Alem,
- 11. Leptsü, 12. Nepang, 13. Temko,
- 15. Aika.

Liliri

TIA SHITETER ALOKBA DANGI MODIBA ARUR :

Modiba : Nabo kü tia khen reprangdangang jo, ni ya yakta asütsü amai shinner ako.

Alokba : Tekabuji kwa..... ümmmm, Sir na ya Christian aser Muslim nunger benjong anogo ka nung tempangtsü sayur ato.

Modiba : Waa, yimsü anaprong benjung anogoji kodang aka?

Alokba : Ajina Sir, na asünüji yimsü anapronglaji benjongtsüa ahar aja, nai tanga yimsü anema mapa tamajung inyaker dang kecha meshii, mangashir ama doktsürjito! Tamangba yimsü yabo kecha mependangi amangdaksüra nü sendongsa tajungtiba ta na meimtsü maha?

Modiba : Oh Alokba!

Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

Meghalaya by-election nung UDP candidate-i takok angu

Shillong, May 13, 2023
(Agencies): United Democratic Party (UDP) candidate Synshar Kupar Roy Lyngdoh Thabah-i Sohiong constituency by-election nung takok nguogo.

UDP candidate Synshar-i 3422 votes (postal votes dena) agi takok angu.

May 10, 2023 nü Sohiong by-election agia liasü. February 27 assembly election atema UDP candidate HDR Lyngdoh ajungbena asüba ajanga iba constituency nung polling masü.

Election Commission Meghalaya ajanga ashiba agi Sohiong by-election nung vote enoktsür 90% tema liasü.

National People's Party (NPP)-i iba by-election nung takok ngua züngsem 60 agi akümbe assembly nung MLA 29 akümtsü meranga liasü saka parnokki tamakok nguogo.

Sohiong by-election nung candidate 6 lir aser parnokki UDP nungi Synshar Lyngdoh Thabah, NPP nungi Samlin Malngiang, Congress nungi S Osborne Kharjana, HSPDP nungi Sandondor Rynthathiang, BJP nungi Sereph E Kharbuki aser TMC nungi Stodingstar Thabah.

ALITAYOKTSÜ LIR

Two Half pura per sq.ft. Rs. 25, From Commanding Junction 5 Minutes. Slightly negotiable
Contact : 986326159

MOLUNGNEN O



Aso
24.03.1939

Asü
22.04.2023

Ozü tsürabur asür **Taliyanger Yaden** (Merangkong) shirangba mapang nungi asüba anogo tashi adianu, tembar, kiyonger, Police Baptist Church Chumukedima, Merangkong Town Baptist Arogo aser temeimbatem, shirnokisa ozü asüko mangyim mapang nung shisatsü, rongsen aser sarasadem ajanga yariogo, nenok ajak dang ozü tepang agi meshitetba tepela tulu lemsateper.

Tsüngrem tulusangi nenok ajak moajangma.

-Temeim Kinüngtsü, Jala Jabasotem, Semchirtem aser Kinüngertem.

TEPELA TASOBA ANOGO SALEM



Mrs. Tsükjemkala Jamir

Temeim Oja/Otsü!

Temeim Tsüngremi ne ket nung amer manilasang, nai iba alizüng tongtetla ma? Pa taochi-i mani asübo onok tanü Oja ajar kong lilaka? Tajungsang Tsüngremi onok meimiyong na arishi küm 75 renteta aniogo. Ne arishi asoshi Tsüngrem nem nüngsang agütsür. Medenser alima ajungai ojalatem nem tenüngsang agütsüba anogo nung iba tepela anogo tenjitepdang kanga temjenogo ta pelar.

- Temeim chirnur aser semchirtem.

Arunachal nung anogo asemnü ICR bandh tiptema agiogo

Itanagar, May 13, 2023
(Agencies): Anogo asemnü Itanagar Capital Region (ICR) bandh tiptema süiogo aser nisung 35 tashi Arunachal Pradesh Unlawful Activities (Prevention) Act (UAPA) 2014 kübok tai tongloka apu ta ICR SP (in-charge) Rohit Rajbir Singh-i ashi.

Parnok ajak tepuokdak yua lir ta SP Rohit-i ashi.

Hokolbarnü dokan aser shishilembadak ajak shibanga liasü aser public garitem mesenzü. Ajisüaka lendong atalokba kecha maliasü.

Itanagar city police-i

Hokolbarnü shirangertem dena nisung 60-65 tashi Hollongi airport aser Naharlagun Railway station-i meina ao, ta SP Rohit-isa metetdaksü.

Paisa Itanagar Market Welfare Association den senden ka amen aser parnok dang dokantem lapoktsü mepishi.

Ano, Nari Shakti aser tanga teloktemi Arunachal Pradesh kübok East Siang district nung ghonda 48 mokdang ayongba ajanga nübortemi timtem ajurua liasü.

Nari Shakti züngsemtem aser tangar aikati Pasighat yimdong

nung lungkak ait. APSC paper temai adokba ken o atema state sorkari temeten magütsür ta parnokki ashi.

Parnokisa activist Sol Dodum aser tangartem police-i pua aliba chioktsü atema takhangba agütsü.

Külen nisung telok kati iba mokdang ayongba magizük aser ketdangsurtem dang lungkak aiterkem anema mapa inyaktüsü takhangba agütsü.

Hokolbarnü Pasighat nung dokantem, bank aser shishilembadak ajak shibanga liasü.



Defence Research Laboratory (DRL)-i Defence Research and Development Organization (DRDO), Tezpur den külemi 25 buba National Technology Day amongdang agiba noksa angur. 1998 küm Pokhran nung nuclear weapons takok ngua tendangba sülen küm shia May 11 nung National Technology Day amonger. Taküm atema omenji 'School to startups-igniting young minds to innovate' liasü.

Livingstone Foundation International

Affiliated to Central Board of Secondary Education

Thahekhu / Kevijau, Dimapur-797112 : Nagaland

☎ : (03862) 244203 (O) +917005996093 / 92

E-mail : livingstone.nagaland@gmail.com

Website : livingstonenagaland.com

Facebook : livingstonenagaland



Congratulations Stonites for excelling in your academics.
Remember learning is a life long process. It's an all round development & not just limited to your grades & marks.

Arts / Sc / Com	1st Division	2nd Division	3rd Division	Total Distinction
GRADE - XII (AISSCE)	75	12	NIL	113
GRADE - X (AISSE)	41	11	NIL	101

STONITE ACHIEVERS (1ST DIV. & DISTINCTION HOLDERS IN VARIOUS SUBJECTS)

 Gavin Sangma (Sc. 95.2%)	 Kewigakhai Mpom (Grade-X 90%)	 Trisha Choudhary (Arts 89.2%)	 Manshvi Rathore (Arts 89%)	 Unoto Kiba (Grade-X 89%)	 Bonovili Chishi (Arts 87.2%)	 Phengmeth B. Konyak (Grade-X 87%)	 Rimson Khumba (Grade-X 86.4%)	 Rajdeep Nandy (Grade-X 86%)	 Rumi Das (Arts 84.2%)	 Rila Sangtam (Sc. 84%)	 Nilvi G. Khujumi (Arts 84%)
 Mahi Jaiswal (Grade-X 84%)	 Paridhi Jain (Grade-X 83.2%)	 Mhareni Elizabeth Odyuo (Arts 82%)	 Thodila K. Sangtam (Arts 81.4%)	 Cynthia A. Warlarpih (Sc. 81.4%)	 Dhiraj Rai (Sc. 81.4%)	 Ghunaka Sema (Arts 81.2%)	 Pritvika Jaishi (Sc. 81%)	 Ayala T. Jamir (Grade-X 81%)	 Chonben Ngutlie (Grade-X 80.4%)	 Marsong Pongon (Grade-X 80.4%)	 Kabo Aye (Sc. 80.2%)
 Aochila Longkumer (Grade-X 80%)	 Changkhumla Chang (Sc. 79.2%)	 Bo N. Chophy (Sc. 79.2%)	 Md. Younus Akhtar (Grade-X 79%)	 Thejoy H. Phom (Grade-X 79%)	 Lisenbeni K. Tsopoe (Sc. 78.2%)	 Kivika V. Zhimomi (Grade-X 78%)	 Lidum Sangtam (Arts 77.2%)	 Tsuzolu Rhakho (Sc. 77.2%)	 Jheel Jain (Com. 77%)	 Nisha Goel (Com. 77%)	 Justin J. Phungreikan (Com. 77%)
 Bendangjungshi (Arts 76.4%)	 Parinaya P. Sharma (Sc. 76.2%)	 Arjpong (Grade-X 76.2%)	 Christo Paul (Grad-X 76%)	 Moachten (Sc. 76%)	 Medoto Pessyis (Grade-X 75%)	 Vinani Y. Assumi (Arts 75%)	 Yivane Zho (Sc. 74.4%)	 Avotla Mungleng (Grade-X 74.4%)	 Imajungba Imsong (Grade-X 74.4%)	 Nandani Kumari (Com. 74.2%)	 Neha Kumari Singh (Grade-X 74.2%)
 Adarsh Gupta (Grade-X 74%)	 Natasha Khaikongor (Arts 74%)	 Henkong B. Konyak (Grade-X 74%)	 Josephine Ngutlie (Arts 74%)	 Nabajyoti C. Deb (Sc. 74%)	 Saomonga A. Chang (Grade-X 74%)	 Kalvi Chophy (Arts 73.2%)	 Tejash Kumar (Grade-X 73.2%)	 Sarchinthong K. Hanse (Arts 73%)	 Vivikali A. Chophy (Arts 73%)	 ZKharumkungbou Newmai (Arts 73%)	 Vikli H. Zhimo (Arts 72.4%)
 Adhiraj Gupta (Grade-X 72.2%)	 Mongin Chingkhong (Grade-X 72.2%)	 Bidhan Chandra Ray (Sc. 71.4%)	 Tsaseli L. Sangtam (Sc. 71.2%)	 Milan Garhwal (Grade-X 71.2%)	 Intiakum (Arts 71%)	 Ishika Jaiswal (Grade-X 71%)	 P. Yeanghe Konyak (Arts 70.4%)	 Mhajamo Kithan (Sc. 70.2%)	 Wabongtemjen Walling (Grade-X 70.2%)	 Nika V. Yeptho (Grade-X 70.2%)	 Hino H. Achumi (Arts 70%)
 Dopong C. Chang (Sc. 70%)	 Khumukham A. (Arts 70%)	 Likhkhai T. Konyak (Arts 69.2%)	 Ngouroubi Newmai (Arts 69.2%)	 Ramkrishna Baidya (Sc. 69%)	 Ridhima Jain (Grade-X 69%)	 Nipuri Yepthomi (Arts 68.4%)	 Monika Das (Com. 68.4%)	 Monika Kumari (Grade-X 68.4%)	 Panoto S. Chophy (Sc. 68.2%)	 Jiya Bhagat (Grade-X 68.2%)	 Shika I. Chishi (Arts 68%)
 Pulovi H. Zhimomi (Grade-X 68%)	 Kinitoli Chishi Sumi (Arts 68%)	 Thepfusanuo J. Rutsa (Sc. 68%)	 Lituna Zhimomi (Arts 67.2%)	 Topeni K. Zhimomi (Arts 67%)	 Nyumei N. Chingkhong (Sc. 67%)	 Kekhriengunuo Usou (Arts 67%)	 Sweta K. Jaiswal (Com. 67%)	 Thejasevor Belho (Grade-X 67%)	 Watlie Rengma (Arts 67%)	 Likupu G. Jimomi (Sc. 66.6%)	 Suangrai Newmai (Grade-X 66%)
 Hito Zhimomi (Arts 65.4%)	 Limi H. Yepthomi (Sc. 65.2%)	 Alisha N. Sangma (Sc. 65.2%)	 Bikali K. Assumi (Arts 65%)	 Taniya Dutta (Arts 65%)	 Zachano Kikon (Sc. 64.4%)	 Jared A. Awomi (Grade-X 64%)	 Priyanshi Dey (Com. 63.4%)	 Takalema Pongener (Com. 63.2%)	 Vikphoto Nicky Tase (Com. 62.2%)	 Nisuvri Aye (Sc. 62%)	 Kilika Zhimo (Grade-X 62%)
 Pukivi Y. Chishi (Arts 62%)	 Shaizen Langthasa (Sc. 62%)	 Protlay Deb (Sc. 61.2%)	 Hikiwi G. Khujumi (Grade-X 61%)	 Chumremo Kikon (Grade-X 60.4%)	 Hewa Kesen (Arts 60)	 Chinglong B. Konyak (Com. 60%)	 Ipulo Awomi (Arts 60%)				

"When your child's foundation is strong, they are prepared to face the world"

LFI COLLEGE ADMISSION

Open for both Boys & Girls 2023-24 Session

Forms are available at the LFI Account Section
between : 9:00am to 2:00pm.

COLLEGE ADMISISON FEES

For both Arts & Commerce - Rs.5000/-

GRADE-XI ADMISSION

1. Admission Forms are currently available at the School Office between 9:00am. - 2:00pm.
2. 100% Concession for Grade-XI in both Hostel & School Fees will be granted to Top 20 Rankers from all recognized Boards
3. 25% Concession in both Hostel & School Fees will also be granted to students with excellent flair, in Sports, Art, Music & other such skills.
4. School Toppers in each stream will be felicitated with Sir Richard Livingstone Excellence Award by Livingstone Foundation Society while collecting the result.

Limited Hostel Seats are available for both Boys & Girls

"Proven as a Trendsetter to make a difference for every child that steps in"

Pakistan tebur team coach asütsü Grant Bradburn shim



Grant Bradburn

Lahore, Monupii/May 13 (Agencies): Pakistan Cricket Board (PCB)-i Honibarnü sangdong ka ajanga, kum ana atema tebur national team head coach mapa abentsü asoshi Grant Bradburn shimba sangdongogo.

Board-isa taoba South Africa cricketer Andrew Puttick, kum ana atema batting strength & conditioning coach Drikus Saaiman aser physiotherapist Cliffe Deacon nati maneni pei mapa abentsü ta metetdaksüogo.

New Zealand nunger Bradburn ya tawa New Zealand den kidang asayaba asayamung nung consultancy basis nung

head coach ama inyaka liasü. Pai national team tashi aser tetsükdaksütem indang kanga junga meteta lir kechiyong pa taoba mapang 2018 nungi 2020 tashi fielding coach ama inyakogo aser iba sülen coach tem anitetsü atema National Cricket Academy-i oa liasü.

Pakistan nung minyak tsüingda Bradburn ya Scotland tebur team coach liasü.

"Sempet tajung aketba Pakistan team amala ka nung head coach mapa inyaksü maongka anguba ya tetushi tulu lir. Asaya yimya ajungkettsü atema onok inyaka aruogo aser onok skill renloka aoba sayutsü yongya atar," ta Bradburn-i ashi. Pakistan team management-

isa asayaba yimya ka sayuogo, aser iba yimya nung 2023 ODI World Cup asayatsü.

"Iba asayaba yimya dang ya 'The Pakistan Way' ta ajar aser One-Day Internationals WC asayatsü asoshi renemshiba aser WC asayaba mapang team-i asaya koda agizüka asayar aji angutsü," ta sangdong ajanga metetdaksü.

Iba dak sendakba nung tawa shimba team director Mickey Arthur-i, "team kati sobaliba ka, brand ka mesüra style ka medeni takok ngura ibaji mapang tatsüka atema asütsü akok saka tanem tanemi tamakok angutsü. Team ka tamakok anguyonga sobaliba ka, brand ka mesüra style ka lira iba team jibo lenmang shitak nung odar," ta ashi.

"Anungji 'The Pakistan Way' ya kodaser ajangzükettetsü? Onoki iba ya onok sobaliba, brand mesüra style benoka asaya takok anguba ajanga ajangzükettetsü. Team nung sobaliba medeni takok anguba ajanga onok temulung masütsü," ta Arthur-i ashi.

Pakistan team 50-over ACC Asia Cup masaya tsüingda Afghanistan den ODI asayamung ka asayatsü lir aser iba mapa parnok team tasa, tashi aser asayartem tendanga asayatsü asoshi maongka agütsütsü.

IOA-i term tembangba WFI ketdang-sürtem nem tenokdangba agütsü

Monupii/May 13, 2023 (Agencies): Indian Olympic Association-i, tang mapa nungi anenba Wrestling Federation of India kertdangsurtem WFI inyakyim dak sendakba nung shilem kecha magitsü asoshi tenokdangba agütsüogo.

Iba tetuyuba agütsüba sülen tawa tentetsüba Ad Hoc Committee nem WFI anogo shia inyakyim achaayangtsü atema autonomous tashi ka agütsüogo.

IOA Joint Secretary aser Acting CEO Kalyan Chaubey-i iba tetuyuba ya May 12 nü agütsü aser ashiba agi, "Wrestling asaya atema IOA-i shimba Ad Hoc Committee yagi Acting CEO nung benoka aliba ama iba National Sports Federation angoshi inyakyim aser khuret ajak achaayangtsü."

Tetuyuba nungsa, "Ad Hoc Committee tenteta lir asünung WFI mapa toktsüba ketdangsurtemi Wrestling dak sendakba nung NSF inyakyim nung kecha shilem magitsü aser parnoki administrative, financial, regulatory mesüra tanga inyakyim kecha nunga shilem magitsü," ta shia lir.

Maneni Kalyan Chaubey-i, mapa toktsüba WFI ketdangpurtem dang financial instruments, sayartem international asayamungtem nung shilem agitsü atema züngoksemdaksütsü asoshi administrative credentials, website management amala densema official documents ajak Ad Hoc Committee nem agütsütsü tetuyuba agütsüogo.

April 27 nü IOA Executive Council jongdak senden ka ayongzüka amenba mapang WFI inyakyim achaayangtsü atema Ad Hoc Committee ka tentetsütsü asoshi telemtetba agi aser May 3 nü Ad Hoc Committee ka shim kong IOA Executive Council Member Bhupender Singh Bajwa aser Suma Shirur, Sportsperson of Outstanding Merit of IOA na densema lir.

Anogo ishika tsüingda IOA-isa, WFI election kecha tetsükdaksü makai agitsü atema Supreme Court mesüra India nung High Court indang retired judge ka Ad Hoc Committee nung züngoksemsütsü.

French Open atema senpet shilem 12.3 agi ajungkettsüogo

Monupii/May 13, 2023 (Agencies): Taküm Roland-Garros atema senpet sen 2022 dang nungi shilem 12.3 agi timba kümtsüogo, ta asayamung ayongertemi Hokolbarnü sangdong ka ajanga metetdaksü.

Asayamung ayongertemi tetsür aser tebur kija asaya nung mezüngbuba round nung tamakok angurtem, qualifying, wheelchair tennis aser quad competitions atema agütsüba

senpet ajungkettsüogo. Kija asaya atema senpet sen ya 2022 den medemdangra shilem 9.1 agi timba kümtsüogo aser mezüngbuba round asem nung tamakok angurtem taoba mapang dang nungi shilem 11 aser 13 agi timba angutsü.

2022 kum temelenshi bener aruba dak ajemdaker asayamung ayongertemi qualifying tetoktepba nung round asem atema senpet

ajungkettsütsü asoshi telemtetba agiogo, koba shilem 11.8 shi ajungkettsü.

Tetsür aser tebur tarep asaya atema senpet sen shilem 4 agi timba kümtsüogo.

Taküm wheelchair aser quad tennis tetoktepba atema senpet euro 810,000 asütsü koba 2022 kum dang nungi shilem 40 agi timba lir.

Taküm French Open ya Paris nung May 28 nungi June 11 tashi asayatsü lir.

Witsel international asaya nungi anener

Monupii/May 13, 2023 (Agencies): Belgium midfielder Axel Witsel-i kum 15 tashi asayaba sülen pa international asaya nungi anenba sangdongogo.

Arishi kum 34 tain Witsel, Belgium team nungi 130 ben asayaogo aser pa 2018 kum Russia nung World Cup asayaba mapang tasembuba jenjang nung tembangba Belgium team nung densema liasü. Pa Qatar nunga 2022 World Cup nung asaya asemprongla nung tetenzük nungi asaya liasü, kong Belgium pur group stage adena masayateti liasü.

"Kanga junga bilemdangba sülen ni international football asaya nungi anentsü asoshi telemtetba agiogo," ta Atletico Madrid nungi asayar yagi Hokolbarnü Instagram nung zülutsü.

"Taoba kum 15 tashi linük tenung nungi asayatsü maongka anguba ya tetushi tulu liasü. Tang ni ozü kibong aser club nem mapa talila agütsütsü asoshi tongtibangba kumogo," ta paisa ashi.

Witsel mezüngbuba senior team nungi 2008 kum March ita asaya liasü. Iba asaya nung



parnoki Morocco goal 4-1 agi makok saka pai Belgium asoshi mezüngbuba goal idakja liasü.

Club jenjang nung pa Standard Liege, Benfica, Zenit Saint Petersburg, Tianjin Quanjian aser Borussia Dortmund nungi asayaogo aser taoba kum July ita Atletico nung oa aden.

Belgium team nungi defender Toby Alderweireld-i March ita aser taoba team captain Eden Hazard-i December ita international asaya nung anentsü telemtetba agiba sangdongba sülen tang Witsel-i iba osang sangdongogo.



Al Nassr forward Cristiano Ronaldo nem tawa sen 94,20,123 alang diamond encrusted green watch ka Jacod & Co.-i agütsüogo. Ronaldo tawa Riyadh nung company indang store tasen lapokba nung shilem agia liasü.

BILEMDANGANG
"Ali mapa arishidang tanüla jenjang tesentok."